

# Maritim Malaysia lupus empat bot nelayan Vietnam

Oleh ROSALINDA MD. SAID | 18 Mac 2021, 8:54 pm



ANTARA empat bot nelayan Vietnam yang ditenggelamkan di perairan Kuala Nerus hari ini untuk dijadikan tukun tiruan.

KUALA TERENGGANU: Empat bot nelayan Vietnam yang dilucut hak ditenggelamkan di perairan Kuala Nerus hari ini untuk dijadikan tukun tiruan.

Pengarah Agensi Penguatkuasaan Maritim Malaysia (Maritim Malaysia) negeri, Kepten Maritim Muhammad Suffi Mohd. Ramli berkata, kesemua bot itu dilucut hak oleh mahkamah pada 2019 kerana mencerooboh dan menangkap ikan di perairan negara.

Katanya, setakat 31 Disember 2020, sebanyak 99 bot ditenggelamkan sebagai tukun di sepanjang perairan Terengganu.

“Ini merupakan pelupusan pertama pada tahun ini kita menjangkakan sebanyak 43 bot lagi bakal ditenggelamkan setelah mendapat pelucutan hak daripada mahkamah.

“Kaedah ini merupakan inisiatif Maritim Malaysia dalam memulihara dan menggalakkan biodiversiti marin di samping simbolik keseriusan kita mengekang kebanjiran nelayan asing ke perairan negara,” katanya dalam kenyataan di sini.

Menurut Muhammad Suffi, program pelupusan bot itu turut mendapat kerjasama daripada Jabatan Perikanan, Jabatan Laut, Persatuan Nelayan Kuala Terengganu Utara dan Institut Sumber Marin Asia Tenggara (ISMAT).

Katanya, Maritim Malaysia akan terus melaksanakan rondaan untuk mengesan kegiatan pencerobohan nelayan asing dan aktiviti-aktiviti yang melanggar undang-undang di sekitar perairan Terengganu. – UTUSAN ONLINE

<https://www.utusan.com.my/terkini/2021/03/maritim-malaysia-lupus-empat-bot-nelayan-vietnam/>